

# *YINKI YINZO NGE KE TUNGILA MUNU?*



Matondo na nge, Mpangi Green. Ya kele bweso. Mbote na Mpangi-bakala mpe Mpangi-kento Green, mpe na bayina nyonso kele awa na suka yayi. Mpe ya kele bweso ti mu ke kuwa ti ba me pesa munu, na kukwiza na kisika yayi ya kusambila, samu na kupesa mwa mazabusu.

<sup>2</sup> Mu zola ve kubaka ntangu ya Mpangi Green's Mill awa, samu ti mu me kuwaka Mpangi Green bambala mingi, kuzonza, mpe kieleka ya bendaka munu, mpe mutindu yandi vwandaka longa Ndinga ya Mfumu na beto, mpe ya kukikulumusa mingi samu na yawu. Mazono yandi tubaka, “Mu ke kuzwaka ve Ndinga na Mfumu mutindu mu banza ti Yawu ke kwiza na luzayikisu, mutindu—mutindu ba fidisaka Yawu, kasi,” yandi tubaka, “Mu ke zolaka ku—kusikimisa yina ba me tubaka.” Yandi tubaka, “Mutindu ntangu Paul kusonikaka kima mosi na kati ya Biblia, mu kwizaka awa samu na kupesa kimbangi na yina yandi tubaka.” Yandi tubaka, “Mu ke na nsangu mosi ve, kaka kusikimisa yina ba tubaka ntete samu na Mfumu.” Ntangu yayi yina vwandaka kieleka nsamunu ya nene, ntwenya ya bakala ya mutindu yayi, mpe kutuba, kusala nsamunu ya mutindu yayi.

Ntangu yayi beto vwanda kaka na mpova ya kisambu kintwadi.

<sup>3</sup> Nzambi ya luzolo, na mpasi mu zaba mutindu ya kubanda, samu ti mu ke kuwa ti Nge kele awa bubu yayi, mpe na Mvwandulu ya Nge beto ke kuwaka ntangu nyonso fyoti. Mpe mu—mu ke tonda Nge samu na bweso yayi. Ntangu yayi, Mfumu, ti Nge me pesa beto kisika yayi, beto ke sambila ti Nge ke kutana na beto ntangu nionso beto ke kutana awa. Mpe bika ti Mpeve ya Nge ya Nene kusala na zulu ya mbanza yayi! Bika ti beto vwanda na lenda ya kunata Nsangu ya mbote yayi yina ba pesaka na beto mpe yina ba monikisaka na maboko ya beto na bilumbu yayi ya nsuka, bika ti Yawu kusalama, mpe Nge basisa konso moyo na Tucson mpe bisika nionso, yina Nge tumaka na Luzingu. Pesa bima yayi, Tata, na Nkumbu ya Yesu Klisto. Amen.

<sup>4</sup> Mu banza ti mu zola kutanga mwa nzila ya Masonuku awa na suka yayi, kaka ntete mu tuba bampova yayi yina mu zola kutuba. Ya kele kuna na Actes, kapu ya 7 ya Buku ya ba-Actes. Mpe na ntangu yina beno ke baka yawu, beto ke banda na nzila ya 44.

<sup>5</sup> Ntangu yayi beto ke kwenda na Shreveport sabala yayi, sabala yayi ke kwisa, samu na bandandani ya balukutakanu, mpe ntangu yayi beto ke meka, kana Mfumu kuzola. Mpangi Moore, Mpangi Jack Moore, nkundi mosi ya mbote ya Mpangi Pearry mpe munu, mpe beto zola Mpangi Jack. Nsangu, mu banza, yandi me vwalangana fioti, mingi-mingi na zulu ya mwa bima yankaka yina ke simbaka beto na ntima mpe yina beto ke kwikila, ti—ti Yawu kwizaka na beto na nzila ya kuzibuka ya Bidimbu Sambwadi, mutindu beto ke kwikila Yawu, mutindu, “nkuna ya nyoka,” mpe “lukengolo ya Seko ya bakwikidi,” mpe—mpe nionso yina, mwa Bansangu yina. Ti, mu banza na bayankaka. . . . Beto ke banza ve ti Yayi kele mpasi, kasi, Yawu, beno fwana zibula ntima ya beno na Kieleka. Beto ke kwikila ti beto ke na kuzinga na ntangu ya nsuka. Ya kele kaka kieleka mingi samu na beto, ti beto kele kaka na nsuka ya nzila.

<sup>6</sup> Mpe kutuba na dibuundu ya muntu yankaka, mbote, nge zola kuzitisa kuyamba ya muntu yina, ya—ya kupesa nge bweso ya kukota na dibuundu ya yandi. Mpe munu, ya kieleka, na kuzabaka ti bawu ke kwikilaka ve na Yawu, mpe mu ke zitisa bawu mingi ti. . . . Ya kele na mingi yina mu lenda zonza kuna, na kisika ya kunata Yawu; kana ve ti ya kele kaka Mpeve-Santu ke pusa Yawu fyoti, beno me mona, na yina kieleka mu ke tuba mutindu Yandi tubaka. Mpe mu zaba ve ya kulutula mbote na kusala yawu, mpe mu banza ti mu me longukaka ata fioti ve kulutula mbote na kusala yawu. Beno me mona? Beto tuba kaka Yawu mutindu Yandi tubaka Yawu.

Ntangu yayi beto tanga kaka nzila mosi to zole awa na kapu ya 7 ya Buku ya ba-Actes, kubanda na nzila ya 44.

*Batata ya beto vwandaka na tabernacle ya kimbangi na ntoto ya kuyuma, mutindu yandi me lakisaka, na kuzonzaka na Moïse, ti yandi zolaka sala yawu landila mutindu yina yandi monaka.*

*Yina mpe batata ya beto kuzwaka na manima ba kotisaka bawu na Yesu na yinsi yina vwandaka ya Bantu ya makanda, bayina Nzambi basisaka na ntuala ya batata ya beto, na bilumbu ya David;*

*Yina kuzwaka lemvo na ntuala ya Nzambi, mpe lombaka na kuzwa tabernacle samu na Nzambi ya Jacob.*

*Kasi Salomon tungaka yinzo samu na yandi.*

*Kasi yina ya Mazulu ke zingaka ve na batempelo yina me salama na bantu; mutindu profete tubaka,*

*Mazulu kele kiti ya munu ya kimfumu, . . . ntoto kele kinyatinu ya munu: wapi yinzo nge ke tunga samu na munu: me tuba Mfumu: to yinki kele kisika ya kupema ya munu?*

*Ya kele ve maboko ya munu salaka bima nionso yayi?*

Na zulu ya Yayi, lutangu ya Masonuku yayi, Mu zola tuba mwa bampova yina mu zola kutuba na ntwala ya Mpangi Pearry ke nata nsangu ya suka.

<sup>7</sup> Mu ke mona ti mosi ya bantangu ya munu ya nene ya kukwisa ya munu na Tucson. Mu kwisaka awa samu ba twadisaka munu na kukwisa awa. Mu me kwiza awa samu ti Mpeve-Santu, na nzila ya vision, me fidisa munu awa. Mu zaba ti ya lendaka monana ya ngitukulu, mu banza. Kasi Yandi, mutindu mu zaba, nyonso yina mu zaba na Nzambi, ba fidisaka munu na vision mosi na Tucson. Mu vwandaka kukiyufula wapi mutindu ba tindaka munu na kisika yayi ya kuyuma. Mpe na yina awa kisika ya kele. . .

<sup>8</sup> Na nzonzolo ya kimpeve, na zulu ya mbanza, Mu zaba ve kisika yina kele ya kulutula ya kufwa na kimpeve, kulutula na kati ya mbanza ya Tucson. Ya kele na mvita na kati-kati ya mabuundu. Ya kele na kuswana na kati ya mabuundu. Ya kele ve na kimvuka, mpe muntu nionso ke na kunwaninaka, mpe ke na kusimbaka, mpe ke na kumekaka na kuzwa muntu *yayi*, mpe ke na kubendaka bamambeke. Ya kele ntoto ya kuyuma, na nzonzolo ya kimpeve, mpe.

<sup>9</sup> Kasi na yina mu tangaka na kati ya Biblia, ti kisika Nzambi bokilaka Moise ntama na baya yandi ya luzolo mpe bayina nionso vwandaka ya luzolo samu na yandi, mpe fidisaka yandi na ntoto ya kuyuma, samu na kusonika Misiku ya Biblia. Yina vwandaka Ngwisani ya Ntama, Babuku yiya ya ntete, Genèse, Lévitique, mpe Deutéronome, Exode. Yandi. . . Ata fioti ve ti mu me tubaka yawu kaka na mumesanu, kasi ya kele Babuku yiya. Ya kele kieleka Ngwisani ya Ntama. Samu ti, bayankaka ya Yawu vwandaka yina baprofete tubaka, na Psaumes ya David, mpe nyonso yankaka yina, kasi ba-Chroniques ya bantinu. Kasi yayi vwandaka misiku ya ngudi ya Ngwisani ya Ntama. Moise sonikaka bawu na manima ba bokilaka yandi na yinsi ya yandi, kisika yandi butukaka mpe yandi kwisaka na kati ya bantu ya yandi, mpe ba fidisaka yandi na ntoto ya kuyuma, samu na kusonika Buku yayi ya Ngwisani ya Ntama.

<sup>10</sup> Na yina mu ke mona ti na kati ya Buku ya Ngwisani ya Malu-malu, kisika Paul, yina kele musoniki, to musoniki ve, kasi musoniki ya Ngwisani ya Malu-malu. Yandi vwandaka diaka ya kunatama na kati-kati ya bantu ya yandi, mpe, na nzila ya Mpeve, na Arabie, kisika yandi vwandaka bamvula tatu na ndambu, samu na kuzwa lutwadusu ya kimpeve. Mpe Paul kele musoniki ya nene ya Ngwisani ya Malu-malu. Ntangu yayi, ya kele na Matthieu, Marc, Luc, mpe Jean, kasi bawu vwandaka misoniki yina sonikaka kaka yina Yesu tubaka mutindu bawu landaka Yandi. Mpe, kasi, beno baka Buku na Timothée, mpe na ba-Romain, mpe na ba-Hebreux, mpe nionso yina, Paul kuzwaka lutwadusu ya kimpeve samu na kusonika Ngwisani ya Malu-malu; na kubakaka Ngwisani nyonso ya Ntama mutindu kivudi,

mpe tulaka yawu na ndonga. Mpe Nzambi zitisaka yawu, mpe salaka yawu Ngwisani ya Malu-malu.

<sup>11</sup> Mpe ntangu yayi kana ba zolaka kupusa Ngwisani ya Ntama na . . . musoniki zolaka bika bantu ya yandi, samu na kukwenda na ntoto ya kuyuma, samu na kuzwa lutwadusu ya kimpeve samu na kusonika Ngwisani ya Ntama. Mpe na Ngwisani ya Malu-malu, musoniki twadisamaka na Musoniki, na kisika ya ntoto ya kuyuma, samu na kuzwa lutwadusu ya kimpeve samu na kusonika Ngwisani ya Malu-malu. Mpe ba me kanga Babuku na Bidimbu Sambwadi; ya ke lomba mpe mutindu mosi, mu ke kwikila, na bilumbu yayi, samu na kuzibula Bidimbu Sambwadi yina. Samu na kubika yina kele ya ntalu samu na beno, yina beno ke zolaka, mpe mwa yinzo yina ba pesaka munu na bantu, mpe na kati-kati ya bantu ya munu nionso mpe bankundi ya munu, mpe dibuundu yina vwandaka ya kutoma, mpe vwandaka na kima mosi ve vwandaka kondwa; mpe samu na kubika—kubika yawu, kukabwana na yawu, mpe kukwenda ntama, kuna na ntoto ya kuyuma kisika beno zabaka muntu ve, mpe nyonso yina me telemina beno.

<sup>12</sup> Kasi ya kele na kima mosi samu na Nzambi, ti Yandi ke twadisaka muntu na kusala bima yina kele na zulu ya mabanza ya yandi mosi, na yawu ya lenda vwanda samu na nkembo mpe lukumu ya Nzambi. Mpe mu ke banza ti, mu ke sala yawu lukumu ve, kasi mu—mu ke banza ti ya vwandaka bweso samu na munu na kubika yina kele ya ntalu samu na munu, samu na kukota awa na ntoto ya kuyuma yayi mpe kutala mpasi mutindu mu me talaka ntete ve mpasi na luzingu ya munu, awa na ntoto ya kuyuma yayi, to ntoto ya kuyuma yayi. Kasi mu ke kwikila, ti na kusalaka yawu mpe kutumama na yina Nzambi tumaka na kusala, Nzambi me fungula na beto mansweki ya kilumbu yayi ya nsuka. Mpe beto kele awa na Nsangu yayi.

<sup>13</sup> Ntangu yayi, ya vwandaka na bantu mingi yina vwandaka landa munu, mpe ya kele ya mumesanu ve. Ntangu nyonso muntu beto . . . Bantu ke zolasana mosi na yankaka, mpe yawu, ke zolaka, ke pusa beno na kusala bima yina beno ke banzaka ve ti beno ke sala. Mpe mingi na kati ya beno me bika bayinzo ya beno, beno me bika nionso, samu na kukwenda, beno kwisa awa na ntoto ya kuyuma.

<sup>14</sup> Mingi me bokila munu, mingi me yufula munu, “Beto ke kwisa na Arizona? Ya ke vwanda kisika ya mbote samu na beto?” Mbote, mutindu ba tubaka na yina me tala Moïse mpe bayankaka, ya vwandaka ve na kisika samu na mbuma, ata kisika mosi ve vwandaka ba-grenade.

<sup>15</sup> Awa bisalu kele ve mingi, mpe luzingu kele ntalu mingi, ntalu ya luzingu kele na zulu mingi. Ya kele ve kima ya kukondwa mpasi samu na kuzinga, na Tucson, na Arizona; balufutu kele na yisi, mpe—mpe madia kele ntalu mingi, mpe kufutula yinzo.

Ya kele—ya kele kisika ya boma na kuzinga, na mutindu yina. Kasi ya kele mbote, ya kele ya kuyuma. Mpe beto bantangu yankaka. . . Beto fwana kuzwa ve mabanza ya beto ya kusala na bima yayi ya ntoto.

<sup>16</sup> Beto fwana tala na lutwadusu ya Mpeve-Santu. Kasi kima mosi ke yangisa munu na kukwisa awa, mpe kutuba na bantu, “Mbote, nge lendaka kwisa ve,” to, “Nge lendaka kwisa,” ti mu ke bika na konso muntu, mutindu Nzambi ke twadisa knso muntu na kusala. Mu banza ti mosi na mosi ya beto zolaka sala yawu, kuvwanda ya kutwadisa na Mpeve, na yina ya kusala.

<sup>17</sup> Mpe mingi ya beno awa kele ya kizunga ya Jeffersonville, mpe ya dibuundu kuna, mpe beno me kwiza awa. Ntangu yayi, kima yina vwandaka kwamisa munu, vwandaka kisika ya kusambila.

<sup>18</sup> Mpe mu me bakula, mutindu mu tangaka na Masonuku awa, samu na Étienne mpe nsamunu ya yandi vwandaka kaka na ntwala ya lufwa ya yandi; samu bawu losaka yandi matadi na nswalu nionso, samu na nsangu ya yandi. Mutindu yandi vwandaka zonga, yandi tubaka, “batata ya beto,” na kuzonzilaka na ba-Hébreux na bilumbu ya ntete, mutindu ti bawu mekaka na kuzwa lemvo na ntwala ya Nzambi, samu na kutunga kisika samu na kusambila. Yandi tubaka yawu, “Salomon tungilaka Yandi yinzo, to kivinga.” Beto me zaba mbote disolo.

<sup>19</sup> Kasi mu ke zolaka bampova yayi yandi tubaka na manima, “Kasi yina ya Mazulu ke zingaka ve na batempelo yina me salama na maboko ya bantu.” Na kisika yankaka kuna na Esaie, yandi tubaka, “‘Nzutu Nge me yidika Munu; beno me mona, munkayulu mpe makabu, mpe bayinzo ya nene, mpe nionso yina, kasi nzutu Nge me yidikila Munu.’” Mbote, beto me bakula ti yandi vwandaka zonga kuna na nzutu kisika Nzambi kotaka, na kati ya Klisto.

<sup>20</sup> Kasi mu ke kwikila bubu yayi, ti lutwadusu ya kimpeve yina me kwiza na—na Mpangi Green, na kukwisa awa, yandi mpe Mpangi-kento Green, ke bika kisika ya bawu kuna na esete, mpe, na . . . kuna na Texas, na kukwisa awa na . . . samu na kubanda na kima mosi ve; kaka na nzila ya lutwadusu ya kimpeve, na nsatu ti bawu lendaka sala yawu. Mu ke sepelaka na bantu yina ke landaka lutwadusu ya Klisto, ata lutangu ya yawu ke lomba bawu.

<sup>21</sup> Ata ti yinza ya muvimba, mu banza bankundi ya beno ya kulutula mbote, ke banza ti beno kele na kifu, kasi ya kele ve yimbi samu na beno. Ntangu nyonso yina beno ke tala ti ya kele na kima mosi na manima ya yawu, ya kele Nzambi ke na kupusaka beno; ya kele ata mbala mosi ve yimbi, mpe ya ke vwanda ntangu nyonso na kima ya mbote.

<sup>22</sup> Beno me mona ntwenya ya bankwelani yayi, ntwenya ya bakala mosi kele na dikabu ya nene. Mu ke tuba yayi ve samu

yandi kele ya kuvwanda awa. Mpe mama yayi ya ntwenia na ba-bébé ya yandi, na dibuta ya yandi samu na kusansa, mpe yandi me bika ksalu ya yandi mpe nionso yina, samu na kukwisa kuzinga awa.

<sup>23</sup> Mu me bakula ti bamvula me luta ba bokilaka munu na ministere. Mu me kuzwaka ata fioti ve lunungu mingi mutindu pasteur, samu mu ke na mpeve ya kuzieta-zieta, ya kuyenga-yenga. Mu lendaka ve kusepela na kisika mosi. Kaka kisika nyonso yina Mpeve ke kwenda, mu fwana tambula kaka na Yawu, samu ti mu kele na Nsangu. Yesu tubaka, “Mu fwana longa diaka na mbanza yayi yankaka.”

<sup>24</sup> Kasi ya kele na bayina kele mivungi yina ke kebaka mameme. Mu ke vutula matondo mingi ti Mpangi Green landaka lutwadusu ya Mpeve-Santu, mpe bubu yayi beto kele na tabernacle. Ya kele ya fyoti. Ya kele kaka mbote mingi na kubanda, samu na kumona yina Mpeve-Santu. . . Na kuzabaka ve, beto tambula kaka malembe-malembe. Ntangu yayi, mu banza, kana Nzambi me tuba na Mpangi-bakala mpe Mpangi-kento Green, na kukwisa awa, mpe me zibula kisika mosi samu na bana ya beto; na kisika ya kutambula na velo na Lumingu na suka, mpe na babala-bala mpe kutambula bisika nyonso, bawu kele na kisika ya kukwiza samu na kusambila, na kisika ya kuvwanda pene-pene mpe kuwa kima yina beto me kuwa na radio, yina kele mbote mingi.

<sup>25</sup> Kasi beto, mutindu nkonga yayi ya bantu, beto kele na Nsangu samu na kilumbu yayi. Beto, beto ke kwikila ti Nzambi me pesa beto Nsangu. Mpe Mpangi Green, kele, mu zola ve kubokila yandi kisadisi ya munu, samu ti beto kele. . . Mbote, ya kele, mpe, kisadisi ya munu, beto kele kintwadi na Nsangu yayi. Mpangi Green ke longaka kima mutindu mosi mpe Nsangu yina mu ke kwikilaka. Yandi me bika yinzo ya yandi, yandi me bika bantu ya yandi, yandi me bika dibuundu ya yandi. Yandi vwandaka, mu banza, yandi vwandaka mukengi ya kizunga to kima mosi, ya mosi ya ba-organisation, mpe yambulaka nionso ntangu yandi kuwaka Yayi. Yandi bikaka nyonso yina vwandaka ya luzolo samu na yandi, mpe, na kukwiza na ntoto ya kuyuma, kaka samu na kusimbisa yina Nzambi ke na kupesaka beto ntangu yayi.

<sup>26</sup> Mu ke tuba ti mu ke kwikila ti ya ke vwanda kaka ve na kati ya bantima ya beto, ya ke vwanda ksalu ya beto na kusimbisa yandi, bima nionso yina beto lendaka, samu na kukwisa na balukutakanu, samu na kukwisa awa samu na kusambila, mpe kusala yayi kisika yina Nzambi lenda monisa na beto bima yina Yandi ke na yawu samu na beto na kumonisa. Mpe mutindu ndinga ya yandi tubaka, “Nsangu ke kwisaka ve na munu na nzila ya kupesa lutwadusu ya kimpeve, mutindu ya lendaka vwanda na bayankaka ya beto, kasi,” yandi tubaka, “Mu kele awa samu na kusimbisa yina Nzambi pesaka.” Wapi mutindu ya

nsamunu! Mpe mu ke kwikila, kana beto nionso ke vukana, beto ke tula bantima ya beto na yawu.

<sup>27</sup> Mu zaba ti mosi na mosi ya beno, kana beno ke tala mutindu mu ke salaka, mu kele na nsatu mingi ya kumona Mpeve ya Nzambi kusala, mu lendaka kaka ve kuvibidila yawu. Mwa banzingulu yina mu kuzwaka kaka na zulu ya mongo, kaka samu na kuwa yawu mbala mosi dyaka, ti ntangu mu kuzwaka mpulusu ntete Kima yina ntete vwandaka ya nkembo mingi na ntima ya munu! Mpe beto lenda kota na kisika mosi, beto lenda vwanda mpe beto ke mona yawu na kati-kati ya beto, ti beto ke na kuyuma. Mutindu beto me vwanda awa na ntoto ya kuyuma, mu ke kota na kati-kati ya bampangi ya munu, ba ke solula na munu mpe mu ke solula na bawu; ntangu nionso, na mwa mutindu ya fioti ya kutala, ya kukitala kuna na mpeve yango, mutindu ya vwandaka, kumona kaka kondisyo ya mpangi ya bakala yina, samu na kumona yina ke tambula mbote ve. Mu me banda na kuwa ti beto nyonso ke na kulemba, beto ke na kukwendaka ntama na Mpeve. Ya me kuma ya kimuntu mingi kima yango samu na beto. Beto fwana sambila na Kimpeve, kisika Mpeve ya Nzambi... Ve kaka Nsangu ya beto zolaka vwanda mulaka ya ngunga, ya zolaka vwanda mulaka na kati ya bantima ya beto. Beno me mona? Ya fwana vwanda na kati ya bantima ya beto, to beto lenda ve—beto lenda kaka ve kutalisa Yawu na bantu. Mpeve fwana nata Nsangu, Yawu mosi. Mpe mu ke tula kivuvu mpe ke kwikila na mosi na mosi ya beno, samu na kuvwanda Muklisto ya kieleka.

<sup>28</sup> Ntangu yayi bawu kele na nsatu ya milongi ya lukolo ya Lumingu. Bawu ke vwanda na nsatu ya bisadi. Mpe mu zola kutuba yayi samu ti beno bakula na mutindu ya kulunga. Yayi kele dibuundu ya munu.

<sup>29</sup> Mu vwandaka awa bamvula tatu. Mpe mu kuzwaka kielo mosi ya kuzibuka samu na munu, yina vwandaka Mpangi Mack lombaka munu na kulonga. Nzambi sakumuna yandi. Ba me bokila munu ve na bantu yankaka; mu ke telemina bawu ve, bawu kele mbote mingi. Mpangi Broy, nkundi ya munu ya mbote, Mpangi Gilmore, mingi ya bampangi ya ba-Pentecotiste yayi awa, kele kieleka, bankundi ya munu ya kieleka. Mu zola bawu; mu ke telemina bawu ve. Mu me bakula ntelamanu ya bawu. Ba lenda bokila munu ve na kati kuna, mpe na manima kuvwanda na organisation ya bawu. Beno me mona, ba lenda sala yawu ve. Samu ti, kana bawu sala yawu, ba ke basisa bawu na ngaanda. Na yina beno ke mona ntelamanu ya bawu. Mu vwandaka na kima mutindu mosi na kizizi. Kasi, oh, bika yawu vwanda ntangu nionso, “Benso sosa ntete Kimfumu ya Nzambi,” luzolo ya Nzambi.

<sup>30</sup> Mpe ntangu yayi yina, Mpangi Green, Nzambi me fidisa yandi awa mpe me zibula beto dibuundu ya mutindu Lukwikilu ya ntalu yina beto ke kwikilaka, beto fwana vutula matondo

mingi na Nzambi, mpe kuvwanda na konso lukutakanu, kubaka konso kisika yina beto lenda. Mpe kana ba me lomba beto na kubokila, na kusambila, samu na kusosa, na kusala, beto vwanda kaka basoda na . . . kaka ntima tiya-tiya ya kusala yawu. Beno me mona?

<sup>31</sup> Beno zitisa Nsangu na lukumu, beno zinga luzingu ya mbote. Beno bika ve mvindu kukwisa na zulu ya Yawu. Beto ke na kuzinga mingi na ntangu lutidi ntangu yayi. Beto me—beto me kuma ntama mingi na ngunga. Beto zinga Yawu na kati ya kuvedila. Mbote, luzingu ya munu, luzingu ya beno, baluzingu ya beto nionso kele na nsatu ya kubaka yawu, na ntwala ya Nzambi.

<sup>32</sup> Bantwenya ya beto ke na kuzietaka, na kisika mosi na yankaka, na kisika ya bansaka na yankaka, mpe ke kwenda ntama mpe ntama mingi na Nzambi. Kieleka. Ntangu yayi, ya kele kieleka. Mu ke mona yawu na kati ya bana ya munu, mpe mu ke mona munu mosi kukuma na kisika yina ve . . . Beno, beno fwana kuvukana beto mosi kintwadi, samu na kusambila Nzambi; Biblia me tuba mutindu yina, “Ntangu beto ke mona kilumbu yayi ke belama, ti mingi ke vukana.” Kana ya kele kaka na bantu zole awa, beno vwanda mosi ya bawu. Ntangu yayi ya kele . . . Mpe kana beto vukana kintwadi mpe beto sambila kintwadi, na yina beto kaka, kima yankaka samu na yawu, Yesu tubaka, “Kisika zole to tatu me vukana na Nkumbu ya Munu, kuna Mu kele na kati-kati ya bawu.”

<sup>33</sup> Ntangu yayi, mutindu mu tubaka na ntwala, Mpangi Green tubaka na munu, mpe yandi tubaka yawu. Kento ya munu kwizaka, tubaka na munu yina yandi tubaka ntangu mu vwandaka ntama. Ti, mpe yandi tubaka na suka yayi, “Chaire vwandaka ya kuzibuka na ntangu nyonso.” Ntangu yayi ntangu nyonso . . . Ya kele, kuzibuka samu na munu na kuzonza.

<sup>34</sup> Ntangu yayi, ntangu nyonso mingi, mu zolaka nata ditoma nzila nyonso na Jeffersonville, na Indiana, samu na kupesa Nsangu yina Nzambi pesaka munu, samu na kunata yawu na bantu; kukwenda nzila nyonso na Jeffersonville, na Indiana, mpe mosi na mosi ya beno ke tambulaka na yinsi ya muvimba, mpe na kukangaka bansinga ya allo-allo mpe nyonso, samu na kuzwa Nsangu, samu ti ya kele yina beto ke na kuzingila. Beno me mona, ya kele samu na yina beto kele awa. Mbote, beto fwana sala dyaka yawu ve.

<sup>35</sup> Nzambi me pesa munu Nsangu, mu lenda tambula kaka awa na chaire mpe kulonga yawu, mpe kuvwanda na kimpwanza ya kusala yawu. Yinga. Mpe mu ke kwikila, na yina, ti Nzambi ya Ngolo nyonso ke sakumuna beno kana beno ke bikana kaka pene-pene ya dibuundu yayi ntangu yayi, nkonga yayi ya bantu. Yina kaka ve, kasi beto basika kuna mpe beto tala kana beto lendaka ve kunata bayankaka. Beno me mona, beto tuba na bayankaka bisika nionso, beto tuba na bawu samu na dibuundu

ya beto mpe yina ya zola kutuba. Yina dibuundu ya beto... Beto kele awa. Beto zola ti beno kwisa, beno nata banzenza, mpe mu ke kwikila ti ya ke vwanda mbote samu na beto nionso. Beno me mona? Beto ke na yinzo, yina beto ke vutula matondo. Beto ke vutula matondo samu na kisika yayi, samu na kuvukana kintwadi.

<sup>36</sup> Kasi, “Kasi yina ya Mazulu ke zingaka ve na batempelo yina me salama na maboko ya bantu, beno me mona, ‘Samu ti Mazulu kele kiti ya Munu ya kimfumu, mpe ntoto kele kinyatinu ya Munu; mpe wapi kisika kele kisika ya kupema ya Munu? Kasi nzutu Nge me yidika Munu.’”

<sup>37</sup> Mpe beto kele Nzutu ya Klisto. Na yina beto ke luta na kivinga mosi na kivinga yankaka, Mu ke kwikila, na kunataka Bansangu ya beto, mpe beto ke kulumuka mpe ke kuzwa balukutakanu ya kubeluka ya nzutu. Mpe nyonso yina Mfumu ke monisa na beto na kusala, beto ke kuzwa yawu kaka awa na kati ya dibuundu, tii ya ke vimba mingi ti beno fwana baka yawu kisika yankaka, mpe kisika yankaka, tii Yesu ke kwiza. Nzambi sakumuna beno. [Kisika ya mpamba na bande—Mu.]

Beto kulumusa bayintu ya beto.

<sup>38</sup> Nzambi ya luzolo, na yina beto me telama awa na estrade yayi, yina ke talisa, kaka na zulu ya autel awa, beto ke bakula ti beto kele dikanda ya bantu yina ke na kufwa, samu na yina me tala ntoto yayi. Beto ke tala na babala-bala mpe beto ke mona ti ba me sonika disumu bisika nyonso, mpe ti Nkembo ya Mfumu ke na kukwendaka na nswalu. Mpe beto zaba, ntangu Nkembo ya Mfumu ke mata, mutindu mosi Dibuundu ke kwenda na Yawu. Nzambi, beto zola vwanda kuna.

<sup>39</sup> Kaka mwa bilumbu me luta, mu vwandaka ya kutelama awa na nsongi ya bala-bala, kaka na simu yina ya bala-bala, mu vwandaka tala défilé yina vwandaka luta na bala-bala; mpe kumona ba-tanki yina ya ntama ya Mvita ya Ntete yina vwandaka twadisa défilé, ya kulanda na tanki ya nene ya kilo Sherman, na manima défilé vwandaka landila kukondwa nsuka, na manima bamama ya mbwetete ya wolo; mwa dibuta ya kupanzana, na kento mosi ke na kudila, mpe na mwana-bakala mosi na bilambu me zimbisa tata ya yandi, mama mosi ya kiboba yina me zimbisa mwana ya yandi ya bakala. Mu banzaka, “Mawa,” kutelema na nsongi ya bala-bala mpe kutala kima ya mutindu yina ke luta. Na yina mu monaka, kaka na ntangu bawu vwandaka luta yinzo yayi, musiki sobaka na *Na Ntuala, Basoda Ya Baklisto*. Ba vwandaka bula makulu ya bawu, na manima; kasi ntangu bawu lutaka kisika yayi!

<sup>40</sup> Nzambi ya luzolo, mu ke banza na ntangu yankaka ya nene ke kwisa, mpe yina ke vwanda mvumbukulu, ntangu bantu ya ntama ke basika ntete, basantu, bankooko. “Samu ti beto yina ke vwanda ya moyo mpe ke bikana ke kanga ve nzila to ke pekisa

ve bayina kele ya kulala; samu mpungi ya Nzambi ke wakana, mpe bantu ya kufwa kati na Klisto ke vumbuka ntete.” Na yina ntangu beto ke mona ti ya nene. . . kaka bantu ke kwenda, ke na kutambulaka na mazulu; mpe beto ke telama, na kuvingilaka nsobolo ya beto, na kuzabaka ti beto ke kubwa na nzila, mpe. Nzambi, kumisa beto basoda ya kukwikama.

<sup>41</sup> Kaka bayina vwandaka kieleka mpe vwandaka na kati ya mvita ke zaba kieleka yina ya zolaka kutuba, kumona ba-tanki yayi ke na kulutaka. Mpe, Nzambi, beto ke banza ti bayina vwandaka na bitumba ya luzingu ke zaba yina yawu zola kutuba, ntangu beto ke na kuvingilaka ntangu ya beto ya kubwa na ntelemanu mpe na kisika, na mvumbukulu, samu na kumata.

<sup>42</sup> Mpe yayi, mpangi ya munu ya bakala ya ntwenia, ya kutelama awa, ya kulongusa mbote, ya kukubama, ya kulwata mbote, ke na kuvingila kiboba mosi ya bakala kutentika maboko na zulu ya yandi, mosi yina kele munwani ya ntama ya ntama kuna na ndilu, na kuzabaka ti yandi fwana kota na bitumba, mpe. Nzambi ya luzolo, na maboko yayi ya kulunga ve mu ke tentika na zulu ya mpangi ya munu ya bakala, na kutalisama ya Nge. Sakumuna Mpangi Green, Nzambi ya luzolo, yina mu ke sakumuna na Nkumbu ya Yesu. Bika yandi nata Nsangu yayi, Mfumu, na kati ya mbanza yayi mpe kisika nionso Nge ke bokila yandi. Ti yandi vwanda ya kukwikama, ya kufuluka na Mpeve, na kuzingaka luzingu na zulu ya nsoni. Nzambi, bika yandi kuzwa bantima ya bantu, ti yandi lendaka longa bawu mpe kutwadisa bawu mpe kutwadisa bawu na nzila yina beto nyonso zola kutambula. Pesa yawu, Mfumu.

<sup>43</sup> Sakumuna kento ya yandi ya kukwikama, bana ya yandi ya fioti. Sakumuna bangolo ya beto awa, mutindu bampangi ya Baklisto awa na zulu ya ntoto, ti beto lenda nata Nsangu ya mbote yayi tii na nsuka ya yinza. Fidisa Mpeve ya Nge na zulu ya yandi, Nzambi. Beto ke sambila na Nkumbu ya Yesu Klisto, mutindu beto ke pesa yandi na Nge. Amen.

Nzambi sakumuna nge, Mpangi Pearry. Nata Ndinga ya Nzambi! 

65-1121 Yinki Yinzo Nge Ke Tungila Munu?  
Tucson Tabernacle  
Tucson, Arizona U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)